

Olsem wanem bambae mi save kam wan gudfala "sitisen blong intanet"?

Long evri dei laef blong yumi, i gat ol rul we yumi mas folem, mo tu, taem yu go long intanet, i gat ol rul long wanem yu save mekem o wanem yu no mas mekem. Taem yu stap mekem wan samting long intanet, yu stap kam olsem wan *sitisen blong intanet*. Hemia i minim se yu mas wok stret, mo yu mas yusum save blong yu blong skelem gud wanem we yu save faenem long intanet, mo yu mas konek mo toktok wetem ol narafala man long intanet long wan gudfala fasin.

Wanem nao samting ya we oli kolem "trak blong intanet" blong mi?

Trak blong intanet blong yu hem i evri samting we yu wokem, raetem o aksesem long intanet, hem i 'yu', olsem we yu stap long intanet, hem i aedentiti blong yu long intanet. Hem i evri samting we yu mekem taem yu stap yusum intanet. Hemia i inkludum ol imel mo ol teks we yu raetem, wetem ol infomesen we yu serem, ol foto we yu aplodem, ol tingting mo ol komen we yu talemaot, mo tu intanet hem i stap kipim rikod long wanem nao ol defren websaet we yu aksesem.

Olsem wan gudfala sitisen blong intanet, i gud blong yu mekem ol samting ya:


1. Protektem mo haedem gud ol sikret infomesen blong yu.
2. No serem krangeke ol samting olbaot, mo tingting gud bifo yu postem wan toktok i go long intanet.
3. Tingbaot ol narafala, mo rispektem olgeta.
4. Kontrolem gud olsem wanem yu yusum intanet, olsem wanem yu lukluk long hem, mo wanem we yu serem, mo hu yu stap storian wetem.
5. Luksave ol denja we maet yu save fesem, mo tekem aksen blong mekem se yu save stap sef.

Stat Tede

Evri taem we yu serem wan toktok, wan foto o wan komen, i gud yu traem tingbaot gud fastaem, se wanem infomesen blong yu nao yu glad blong ol narafala man oli save luk, mo wanem samting nao yu no wantem oli save long hem. Hemia i save givhan blong protektem ol praevet infomesen blong yu, blong mekem se ol narafala man oli no save aksesem mo go insaed long trak blong intanet blong yu, mo afta maet oli save mekem problem long yu o oli save winim sam samting aot long ol sikret infomesen blong yu.



Tingtingbak



"Mi stap tingting gud mi wan fastaem, afta mi jes serem tingting i go"

Rispek



"Mi stap mekem long ol narafala man i olsem we mi wantem oli mekem long mi"

Aksen



"Mi stap folem ol sef mo stret fasin blong yusum intanet"